

EKALESIA FA'APOTOPOTOGA KERISIANO
I AMERIKA SAMOA

'AU LEOLEO

TUSI FAILOTU
2022



IA TATALO MA MATAALA

EKALESIA FA'APOTOPOTOGA KERISIANO
I AMERIKA SAMOA

'AU LEOLEO

TUSI FAILOTU
2022



IA TATALO MA MATAALA

Laulau Mafutaga Aoao 'Au Leoleo EFKAS:

Tautalatasi P. Fanolua FT, Peresitene
Mafutaga Faaleaoga FT, Failautusi
Tafailematagi Muasau FS, Teutupe

Saunia lenei Tusi Failotu:

Aufaigaluega Pulega Vaifanua

Leanavaotaua S. Sevaetasi FT
Afalupetoe Uta'i FS
Siaosi Fale FS
Pesamino Tuitea FS
Faletoi Aofia FS

UPU TOMUA

O le Atua Tolu Tasi Paia, le Tama, Alo ma le Agaga Paia; i lona alofa tunoa ma lona aao malosi sa faatonu folau i la tatou galuega mai lena tausaga ua mavae, ma ua tatou taunuu mai ai ma le manuia ai i lenei tausaga fou. Ma, ia tumau pea ia te Ia le viiga, le faamanu ma le faaneetaga, nei, e oo i le faavavau. Auā ua na faia pea mea Silisili tatou te olioli ma fiafia ai.

Ou te faatalofa atu i le suafa manumalo a lo tatou Alii Faaola i le paia o la tatou Ekalesia, le mamalu o le aufaigaluega faapea tagata lolotu, aemaise le Mafutaga Tatalo a le 'Au Leoleo. Talofa! Talofa lava! Malo le failalaga; faafetai le galulue; malo tatalo.

E le tau faamatalaina le uiga ma le faamoemoe o lenei mafutaga. O le mea lea, le 'au paia e, o le Ekalesia ma le 'Au faatuatua, ua valaauina tatou ina ia tatou faamalolosi ma finafinai e faatina lo tatou valaauina. Tatalo lou finagalo i le faaali mai o le Agaga o le Atua e ala i ana Afioga e faavae ai a tatou tatalo.

E fia faamauina le agaga faafetai i le Susuga i le faifeau ia Afalupetua Uta'i ma le 'aufaigaluega faifeau o le Pulega Vaifanua mo le saunia o lenei tusi e fai ma taiala e fesoasoani i la tatou 'au fai tatalo. Faafetai tapena! Malo le tauatai!

Ia manuia le Folauga a la tatou Ekalesia i lenei tausaga i tiute ma faiva eseese, aemaise mafutaga tatalo.



Tantalatasi P. Fanolua FT, *Peresitene*
Mafutaga Aoao 'Au Leoleo EFKAS

IANUARI 1, 2022

Tusi Faitau: Kenese 1:26; Mataio 6:10

Matua: Kenese 1:26 “Ona fetalai ane lea o le Atua, inā tatou faia o le tagata i lo tatou faatusa, ia foliga ia i tatou; ia pule foi i latou i i’a i le sami, ma manu felele, ma manu vaefa, ma le lauelele uma, atoa ma mea mea fetolofi uma e fetolofi i le ‘elele.” *“Then God said, “Let us make humankind in our image, according to our likeness; and let them have dominion over the fish of the sea, and over the birds of the air, and over the cattle, and over all the wild animals of the earth, and over every creeping thing that creeps upon the earth.”*

AUTU: “**TATALO, NA FANAU MAI LE ATUA**” [Prayer was born out of God]

E ao ona tatou mua’i malamalama i le faamoemoe o le Atua Foafoa, ona malamalama lea i le tatalo. Auā o le tatalo na afua mai i le pule-faavae na tuuina mai e le Atua I LE TAGATA e palefeaga i le va o le Lagi ma le Lalolagi, atoa ai ma Lona faamaoni i Lana Upu (O Lana Fetalaiga lea e panepanea ma atoaatoa). O le fausia o le tagata ma lona inati-to o le ‘pule’ e faatino ai matafaioi na ave i ai e le Atua. O le tagata e valaau ma mafuta ai i le Atua ina ia faia lona finagalo i le lalolagi faapei ona faia i le lagi; o iina na fanau ai le Tatalo.

To understand Prayer, we must first understand the Purpose of the Creator. Prayer is the Result of God’s established authority structure between Heaven and Earth, as well as His faithful to His Word. This is; because prayer was born out of Man’s God-given assignment. Genesis 1:26, His Design is for man. The human beings to call upon Him to fulfill His word on earth as it is in heaven. Matthew 6, Jesus teaches His disciples about the Kingdom prayer template. In verse 10 of Matthew 6 is the reminder of the original purpose of prayer as in Genesis 1:26.

FESILI MO TALOSAGA:

1. E le mafaia ona faia e le Atua o se mea pe a le to mai lau pule po o lau Ioega. O le faatonu mai o le Tusi paia, “..ia tatalo e le aunoa”, O lona uiga ia ‘aua nei motusia le sootaga o le tagata ma le Atua e ala i le pule (dominion) ua Ia aumai. O le a sau faafetai i le Atua i lena ‘pule’?
2. Ia tatou iloa na masofa le pule talu Atamu i le amataga, aua na tuu ia ai le pule sa’oloto vagana tapu na ia sese ai ma palasi ai ma leiloa pe aveesea ai le pule lea. E ao ona faatoese le tagata ina ua sese ma motusia le sootaga lea o tatalo ma le Atua; Pe o faamaonia lea taofi mo oe i lenei amataga o le tausaga?
3. Ia manatua upu o le faavaa o tatalo lea na a’oa’o ai e Iesu ona so’o, “Ia oo mai lou malo, ia faia lou finagalo i le lalolagi e pei ona faia i le lagi.”

Mana’o Iesu e lolo’u mai le lagi i le lalolagi. Tatalo ia ta faapea ona faia. O le gagana fou o le malo lea ina ua afio mai le Agaga Paia o le ola fou, o le ola ua toe fuata’iina ona o Iesu.

IANUARI 8

Tusi Faitau: Kolose 3:15-17

Matua: Kolose 3:15 “Ia pule foi le filemu mai ia Keriso i o outou loto, o le mea lea ua valaauina ai outou e fai ma tino e tasi; ma ia outou saga faafetai.”
“And let the peace of Christ rule in your hearts, to which indeed you were called in one body. And be thankful.”

AUTU: “O LE TAGATA UA IA KERISO E TUMU SAUO’O I FAAFETAI” [Fullness of Thanks is In a Person in Christ]

FESILI MO TALOSAGA

1. O a ni mea nai lou fatu e ao ona e saga faafetai ai i le Atua?
2. O a ni mea sese, pe sasi ua e lagona; e a’oa’o mai i lou olaga ma lau savaliga ia faamama e le toto o Iesu?
3. Ta’u i le Agaga Paia ou mana’oga; ia tusa ma le mana’o o le Atua ia te oe.

IANUARI 15

Tusi Faitau: 1 Samuelu 12:19-25

Matua: 1 Samuelu 12:23 “O a’u foi ia mamao ia te a’u ona ou agasala i le ALI’I i lo’u tuua o le fautua (tatalo) mo outou; ou te faasino foi ia te outou le ala lelei ma le tonu.” *“Moreover, as for me, far be it from me that I should sin against the LORD by ceasing to pray for you; and I will instruct you in the good and the right way.”*

AUTU: “O LE AGASALA PE A LE TATALO” [Not To Pray Is Sin]

FESILI MO TALOSAGA:

1. E tu’u avanoa le Atua i Lana tagata ua sese, ina ia maua lona mafaufau suia. Pe le avea na avanoa ma ala o Faafetai meamanu o ola?
2. Afai e tumau ona leaga pea, e i’u ina fano. O le a se uiga ma se aogã o se faatoesega?
3. Ia e mautinoa nei, e matua silisili ona taua ma tataua, ia Tatalo e le aunoa; o se matafaioi e leai sona faanoi. Auã o le agasala le leai o se tatalo.

IANUARI 22

Tusi Faitau: 1 Tesalonia 5:16-22

Matua: 1 Tesalonia 5:16-22

*Ia Outou Saga Olioli i le Alii (*Rejoice always*)

*Ia Tatalo e le aunoa (*Pray without ceasing*)

*Ia Faafetai i mea uma lava (*Give Thanks in all Circumstances*)

*’Aua tou te tineia le Agaga (*Do not quench the Spirit*)

* ‘Aua le ta’u faatauavaa i perofetaga (*Do not despise the words of prophets*)

*Ia Tofotofo i mea uma lava (*Test Everything*)

*Ia mamao ma mea leaga eseese uma lava (*Abstain from every form of evil*)

AUTU: “FAUSAGA MO LE TAGATA TATALO” [Forming the Person of Prayer]

FESILI MO TALOSAGA

1. O a mai lou soifuaga tatalo; mafuta so’o pe mafuta motumotu; a’o se a e te faafetai ai i le Atua; pe afai e seasea lua mafuta?
2. O le a se mamao ma se faauouoga ma le fili, le tiapolo faaosooso e faavaivaia lou mafuta i le Agaga ma faoa lou olioli; pe e te moomia se faatoesega?
3. O lo i ai le mana’o o le Atua mo oe, tatalo nei i le Agaga Paia ina ia e iloa lona finagalo mo lou olaga ma lou soifua tatalo.

IANUARI 29

Tusi Faitau: Salamo 32: 1-11

Matua: Salamo 32:6-7 “O le mea lea e tatalo atu ai ia te oe o e amio Atua uma lava, i ona po e maua ai oe; e moni e le oo ia te i latou tafega o vai e tele. O oe lava lo’u lafitaga, e te leoleoina a’u i le puapuaga, e te si’osi’omia a’u i siva o le olataga.” *“Therefore, let all who are faithful offer prayer to you; at a time of distress, the rush of mighty waters shall not reach them. You are a hiding place for me; you preserve me from trouble; you surround me with glad cries of deliverance.”*

AUTU: “O LE MANUIA O LE FAAMAGALOINA” [The blessing of forgiveness.]

FESILI MO TALOSAGA:

1. O se a se tala sili i le tagata agasala ua faamagaloina, ua sa’oloto, ua faamamaina; o le a se faafetai e momoli i lea lagona?
2. Po ua aanoa ona lagona mea sese e iloa ai ona faatoese i le Atua?
3. Amuia le tagata ua fai le Alii mona Atua; auã e lavea’iina i mea uma.

FEPUARI 5, 2022

Tusi Faitau: 1 Ioane 4:7-21

Matua: 1 Ioane 4:8 “O se le alofa ua le iloa e ia le Atua; auã o le Atua o le alofa lava Ia.” *“Whoever does not love does not know God, because God is love.”*

AUTU: “O LE ALOFA NA’UA O LE ATUA, ‘AUA E TE MELEA”

FESILI MO TALOSAGA:

1. Afai o le alofa i upu Eleni faapei o le:
 - i. Alofa faa-uo, faa-uso: philia,phileo [friendly, brotherly love];

- ii. Alofa faa-aiga: [affectionate bond btw parents and children];
 - iii. Alofa tuinanau: eros [erotic romantic love];
 - iv. Alofa faa-Atua: agapeitos [Godly divine love, unconditional love];
- Ua faaalua ai le silisili ese o le alofa o le Atua; Se a sau faafetai i lea Alofa?
2. E faamasino mai ia alofa mo i tatou uma; o fea le alofa ua e sesê ai ma le atoa le faatinoga pe le fai lena ma faatoesega?
 3. Ia tatou taitoatasi ma maua le alofa moni o le Atua, e manuia ai i mea uma.

FEPUARI 12

Tusi Faitau: 2 Samuelu 9:1-13

Matua: 2 Samuelu 9:3 “Ua fai atu le Tupu, ‘E le o toe ea se tagata o le aiga o Saulo, ou te faia le alofa o le Atua ia te ia? Ona fai mai lea o Sipa i le tupu, ‘Ua toe se atalii o Ionatana o lo o pipili ona vae.’” *“The king said, ‘Is there anyone remaining (still alive) of the house of Saul to whom I may show the kindness of God?’ Ziba said to the king, ‘There remains the son of Jonathan; he is cripple (lame) in his feet.’”*

AUTU: “**IA AVEA MA TAGATA TAUSI FOLAFOLAGA**” [Be a Promise Keeper]

FESILI MO TALOSAGA:

1. O le tala i le Tupu o Tavita, lea ua tino lana feagaiga ma folafolaga sa fai ma Saulo ma Ionatana lana uo pele, ina ia alofagia lona tupuga. O le a se agaga faafetai ua e a’oa’oina i lenei tala?
2. Ia manatua o Mefiposeta e pipili uma vae. Sa mau i Lotapara o le uiga o le igoa, o le nofoaga ua leai se faamoemoe, o i ai le mativa ma le tuulafoaiina. A’o lea ua amanaia ma faataua, lea ua toe to manuia o le aiga-tupu mo ia ma ua faamanuiaina. Ae a Oe? Vaai maulalo ma faatauemu i tagata mama’i ma e le atoatoa le tino ma le mafaufau, ma e ua ta’u o ‘vale, aemaise e ua faapei o Mefiposeta? Faatoese ia i le Alii!
3. Ia tutusa upu e lafo ma le faatinoga. Savali i au polomisi ma folafolaga. *Walk the Talk!*

FEPUARI 19

Tusi Faitau: Ioane 17:1-9

Matua: Ioane 17:3 “O le ola faavavau foi lenei, ia latou iloa Oe le Atua moni e toatasi, atoa ma Le ua e auina mai, o Iesu Keriso lea.” *“And this is eternal life, that they may know you, the only true God, and Jesus Christ whom you have sent.”*

AUTU: “**O LE A LE OLA FAAVAVAU?** [What is Eternal life?]

FESILI MO TALOSAGA:

1. O se tasi nei tatalo umi o le Feagaiga fou na tatalo ai Iesu mo ona so’o ma e ua faatuatua ma talitonu i lana Feau. Ua faamanino e Iesu le uiga moni

o le Ola faavavau; ia matua iloa, malamalama i le Atua moni ma Iesu Keriso. Faafetai ia Iesu o Ia o le Malamalama ua tatou malamalama ma Iloa atu ai le Atua.

2. Faatoese i le faauiga sese o le Ola faavavau; e le o le umi o le soifua tulu'i, auā ia iloa e le oti se agaga; e faavavau lona ola i le Atua, a'o le tino e i'u i le 'eleele.

3. Po ua e mautinoa o oe o le fanau i le Atua, o tagata sitiseni i lona Malotupu i le lagi e ao ona matua saili [seek], su'esu'e [study] ia iloa le Atua?

FEPUARI 26

Tusi Faitau: Mataio 6:25-34

Matua: Mataio 6:33 “A ia outou mua’i saili Lona malo ma Lana amiotonu; ona faaopopo atu lea o ia mea uma ia te outou.”

Matthew 6:33 *“Seek (strive) ye first the kingdom of God and His righteousness; and all these things shall be added (given) unto you.”*

AUTU: “O LE FAAMUAMUA SILI” [The Great Priority]

FESILI MO TALOSAGA:

1. O le upu mua’i o lona uiga ia muamua, numera tasi, faataua, sini, o le faamoemoe lea o Iesu ia malamalama i Lana Feau. O le 'Malo o le Atua ma Lana amiotonu', o le Tala lelei lea na afio mai Iesu e momoli mai. Lea na a'oa'o i le tatalo, “Ia o'o mai lou malo , ia faia lou finagalo i le lalolagi, faapei ona faia i le lagi.”Ia faafetaia le Atua ia Iesu ona o le Tala Lelei o le Malo o le lagi mo le lalolagi. Ia faapei le lalolagi o le lagi.

2. Ua ese le faamuamua ua faia e tagata, ua o'o lava ina sese le tala o tala'iina. E ao ona faatoese ma faalelei ma le Atua ina ua sese le faamuamua.

3. Ia talia le Tala Lelei o le malo o le Atua; ona le toe popole lea. O le a o e faamuamua?

MATI 5, 2022

Tusi Faitau: Luka 4:42-44

Matua: Luka 4:43 “A ua fetalai atu o Ia ia te i latou, E tatau ona Ou folafola le tala lelei o le malo o le Atua i nisi aai foi; auā o le mea lea na auina mai ai a'u.” *“But He said, “I must proclaim the good news of the kingdom of God to the other towns also, because that is why I was sent (for this purpose).”*

AUTU: “IA NOFOILO LE POGAI NA SAU AI IESU”

FESILI MO TALOSAGA:

1. E le i sau Iesu ma se lotu (religion). Na afio mai Iesu e toe aumai le Malo na leiloa (lost) talu Atamu muamua. (Adam lost everything, the kingdom,

and the holy spirit). Nai le Kenese e oo i le Malaki; o lo tusi aga'i i le afio mai o le Mesia, o le Tupu ma lona malo. E malamalama foi le Tusi Paia pe a e faitau ma vaai i ai faa-malo o le Atua; aua o le tala i le Tupu ma Lona Malo i le lagi, o lana fanau, o lana pulega faa-Tupu ia faalateleina ina avea le Lalolagi (Earth) ma Teritori o le lagi (Heaven) ia faia ai lona finagalo i le lalolagi. Lea ua faaaliala e Iesu le mafuaaga na sau ai. Na afio mai e tala'i, folafola le Tala Lelei o le Malo o le Atua. O le malo e i ai ona Tulafono ma Ta'iala afai e usita'i ma faalogo ai; e le uma manuia faapei ona maua i le lagi. Po ua e talia lea?

2. Ia manatunatu i le agaga o upu a Iesu mo lau tatalo. Pe e te talitonu i le mau a loane, o le ala foi lea na fanau mai ai a'u?

MATI 12

Tusi Faitau: Mareko 1:21-28

Matua: Mareko 1:27 “Ona taufaifofo ai lea o i latou uma, ua latou fesili le tasi i le tasi, “Pe se a lenei ? Se a foi lenei a’oa’oga fou? Auã ua pule o Ia i agaga leaga, ma fetalai atu i ai, ona latou faalogo lea ia te Ia.” *“The people were all amazed that they asked each other, What is this? A new teaching - with authority! He even gives orders to (unclean) impure spirits and they obey Him.”*

AUTU: “**O LE PULE UA IA IESU, O LAUNA FOI LEA**” [Authority of Jesus is likewise yours].

FESILI MO TALOSAGA:

1. O le Tala atoa a Mareko ua faaaliala ai Iesu o i ai le “Pule” (authority) ma le “Mana” (power). O le pule lea na leiloa (lost) na tuu ia Atamu i le amataga. Afio mai Iesu o le Atamu II, ma toe aumai le pule lea mo tatou uma. Pule e faamalolo ai so o se mafatiaga ma faafitauli e o’o a i ma’i uma. O lou inati to lea ua aumai e Iesu Keriso e faaauau ai lau molimau i le lalolagi. Po ua e tulia se temoni? Ua e tatalo i se tasi ma faamalolo i le suafa o Iesu? A malolo se ma’i, o lena ua oo’ mai le malo o le Atua. O Lana faamalologa e ala i Foma’i, Taulasea, ma e Fofu ma Saeinisi, ma isi; o i latou ua faameaalofaina e le Atua e tautua tagata uma i le lalolagi. O oe foi, ia fai ma fofu o faafitauli i so o se mea e te i ai; auã o launa foi lea i le Pule ma le mana mai ia Iesu Keriso.

2. E iai tagata ua leva ona lotu, taulagi le kerisiano, ae a oo mai faafitauli ma ma’i tevolo ona galo lea o le pule ma le mana o Iesu ae lilifa i fofu taulaitu; Pe le ua matuã moomia se faatoesega i lena aga le faatuatua ma faapaupau?

3. Ia manuia ma fua fetiitii lau tatalo.

MATI 19

Tusi Faitau: Mareko 11:12-14, 20-25

Matua: Mareko 11:25 “A outou tutû ma tatalo, ai se mea tou te tigã ai i se tasi, ia outou faamagaloina; ina ia faamagaloina foi e lo outou Tamã o i le lagi a outou agasala.” *“And when you stand praying, if you hold anything against anyone, forgive them, so that your Father in heaven may forgive you your sins.”*

AUTU: “E OONA LE LOTO (TATALO) LE FAAMAGALO”
[Unforgiving heart (of prayer) is poison]

FESILI MO TALOSAGA:

1. O le a se faafetai e talia e le Atua nai le loto tigã ma le ita faamoemoe (bitterness) i lou uso a tagata po o lou tuaoi? Auã o le tigã ma le ita lea e fanau mai ai le ola lê faamagalalo. O le fofo, ia ola fefaamagaloa’i, ona talia lea o oe e le Atua.
2. O le faamagalalo (forgive), o le fatu lea o le feau a Iesu i le taua o le ‘faatuatua’ pei ona pe-lipi ai le laau o le mati. E afaina le ola faatuatua talu le loto lê faamagalalo. E moomia le faatoese i le Atua. Ka’i keke ga mea e ke gofo ma oe? Faamamã loa.
3. Amuia e loto mamã auã latou te iloa atu le Atua (Mataio 5:8). O fua ia o le ola ua faamagaloina, auã ua leai ni tigã/lapisi/lavelave sa fai ma pupuni i le va ma le Atua. Pe e te fia vaai faapena i le Atua? O ai la e vavaoina oe? Fai atu ai fo’i. Tatalo manuia.

MATI 26

Tusi Faitau: Mataio 24:1-13

Matua: Mataio 24:14 “E tala’iina foi lenei tala lelei o le malo i le atulaulau uma, e fai ma molimau i nuu uma; ona oo mai ai lea o le gataaga.” *“And this gospel (good news) of the kingdom will be preached (proclaimed) in the whole world as a testimony to all nations, and then the end will come.”*

AUTU: “E FAALAGOLAGO LE I’UGA IA TE OE” [The End depends on You]

FESILI ma le fesoasoani MO TALOSAGA:

1. Afai e le so’o nu’u uma i le tala’iga o le tala lelei lea, Tala Lelei o le Malo o le Atua, e le o’o mai le i’uga. Pau a lea o le Talalelei na sau Iesu e tala’i., tala i le malo-Tupu i le lagi ina ia faia i le lalolagi. O le upu nu’u (nations) e mai le upu Eleni, (ethnos means special grouping committed to single idea or a common belief system; Judicial system, Medical system, Sport system, etc.) O vaega eseese ia ina ia tala’ina ina faatalaleleia i a’oa’oga faa-maloo le Atua.

O ai la e tala’iina ma momoli le mau; o Oe, o tatou uma, o le Ekalesia e malamalama i le Pulega faa-Tupu a le Atua i le lalolagi. Tele Ekalesia e le o a’oa’oina le talalelei lea o le malo-Tupu o le Atua; ina ia molimau i vaega uma.

Ua tele foi tala'iga i le gataaga o le lalolagi, ua taufaafefe, taufaasese, ma mataupu silisili ua seetia ai tatou i le sese uiga ese. A o le moni lea ua fetalai ai Iesu i le mau a Luka; Tatou te iloa le gataaga pe a soo vaega uma i le talalelei moni lea - o le malo o le Atua. Ia e mautinoa e i ai foi isi tala lelei (other gospels) o tala'iina. Tatou tatalo i lo ta faaaogaina, i le fai ma molimau, fai ma avefeau, fai ma amapasa o le malo o le Atua e tala'iina le talalelei tu tasi lea i le lalolagi.

APERILA 2, 2022

Tusi Faitau: Mataio 6: 24-34

Matua: Mataio 6:33 *“A ia outou mua’i saili lona malo ma lana amiotonu; ona faaopoopoina atu lea o ia mea uma ia te outou.”*

AUTU: “IA SAILI I ALA O LE ALII E MANUIA AI LE OLA”

Tatou Faafetai i le Atua:

1. Ona o le loloto o upu mai lana Afioga Paia, ua a’oa’o mai ai i tatou ina ia o tatou mua’i saili le Atua ma lana amiotonu.
2. Ona o Iesu Keriso lona Alo, na ia faasino mai mo i tatou le ala tatou te maua ai le olioli ma le filemu moni.
3. Ona o le fesoasoani mai o lona Agaga Paia, ua tatou manino ai i le ala tonu e ao ona o tatou savavali ai.

Tatou Faatoese i le Atua:

1. Ona ua tatou fiafia pea e ola i le agasala ma le leaga, ae ua tatou le saili ma mulimuli i ala o le Alii.
2. Ona ua tatou le saili i ala o le Alii, a e ua tatou faamuamua o tatou ala.
3. Ona o le vaivai o lo tatou ola saili atu i le Atua ma lana amiotonu.

Tatou Tatalo i le Atua:

1. Ina ia o tatou maua le loto maulalo, e taliaina ai i o tatou loto le Atua ma lana amiotonu.
2. Ina ia fesoasoani mai le Agaga o le Atua ia i tatou, e tuuese ai le olaga tuai, a e faasaga atu i le Atua e maua ai le ola fou.
3. Ina ia faapogisaina o tatou mata mai mea leaga o lenei olaga, a ia saili atu ina ia tatou maua Iesu le Alii o le ola.

APERILA 9

Tusi Faitau: Sakaria 9:9-12

Matua: Sakaria 9:9 *“...faauta, o le a alu atu lou Tupu ia te oe, o ia o le amiotonu ma le faaola; e agamalu o ia, o loo ti’eti’e i le asini, o le tama’i asini fo’i.”*

AUTU: “O LE MALAGA FAA-TUPU A IESU”

Tatou Faafetai i le Atua:

1. Ona o Iesu Keriso o le atoaga ma le taunuuga o le Alofa Tunoa o le Atua ia i tatou.
2. E ui lava ina o tatou magoto i le loloto o le agasala, a ua Ia afio mai lava e ala ia Keriso e lavea'i i tatou.
3. Ona o lona afio atu i Ierusalemua ua faailoa mai ai, o ia o le Tupu e filemu ma agamalu.

Tatou Faatoese i le Atua:

1. Ona o loo faatauasoina pea o tatou mata e le fili, ua le moni ai ma atoatoa lo tatou taliaina o Iesu i o tatou loto.
2. Ona o loo pogisa pea o tatou tagata i le uiga o Iesu, ae maise o lona tulaga Tupu i le lalolagi.
3. Ona ua pei lava i tatou o tagata Iutaia, tatou te alalaga Osana, ia manuia le afio mai i le suafa o le Alii, a e mulimuli ane ua tatou alalaga ia faasaturo ia te ia.

Tatou Tatalo i le Atua:

1. Ina ia faamatalaloto pea lona Agaga ia i tatou i le moni ma le faamaoni o lona alofa mai mo i tatou.
2. Ina ia o tatou malamalama i le aano moni o le malaga faa tupu a le Aiii o Iesu.
3. Ina ia o tatou taliaina ma le faamoni le pule faa tupu a Iesu i le lalolagi.

APERILA 16

Tusi Faitau: Luka 24: 13-35

Matua: Luka 24:32 *“E le’i mu ea o ta loto i totonu ia i taua, ina ua fetalai o ia ia i taua i le ala, ina ua faamatala mai fo’i e ia o Tusi ia te i taua i le ala? A o lenei, ua toe faatuina mai Keriso i e ua oti, ua avea ma faapolopolo o e ua momoe.”*

AUTU: ‘UA TOE TU MAI KERISO MAI LE OTI’

Tatou Faafetai i le Atua:

1. Ona o le loloto ma le anoa o le Toe Tu o Keriso ua fai lea ma o tatou olataga.
2. Ona o le ToeTu manumalo o Keriso, lea ua tatou manumalo a’ia’i ai faatasi ma ia.
3. Ona o Iesu Keriso o lo tatou ala i malo.

Tatou Faatoese i le Atua:

1. E iai taimi e faigata ai ona tatou talia le Toetu o Keriso, ona o uiga vaivai o le olaga.

2. Ona o uiga masani o le olaga, e tosina gofie ai o tatou tagata.
3. Ona o le pupu o tatou loto i tu'inanuga o le lalolagi,ua faafaigata ai ona tatou talia le Keriso Toetu.

Tatou Tatato i le Atua:

1. Ina ia ta'ita'iina pea i tatou e le mana o lona Toetu, e mausali ai lo tatou ola talitonu ia te Ia ma lana faaolataga.
2. Ina ia avea pea lona toe soifua manumalo mai le oti ma le tuugamau, e fai lea ma ogatotonugalemu o lo tatou faatuatuaga.
3. Ina ia aua lava ne'i mate lo tatou tala'i atu, o Iesu ua toetu mai nai e ua oti.

APERILA 23

Tusi Faitau: Ioane 20:19-23

Matua: Ioane 19:20 “*Ona olioli ai lea o le au soo ina ua latou vaai atu i le Alii.*”

AUTU: “IA TATOU MOLIMAU I LE TOE TU”

Tatou Faafetai i le Atua:

1. Ona o le mana o lona Toetu, e faatupuina ai pea lo tatou fiafia e tala'i atu le Alii Toe Tu.
2. Ona o le alofa tunoa o le Atua e ala lea ia Keriso, ua aumaia ai ia i tatou le olioli moni.
3. Ona o lana pule aoao i mea uma, ma e oo a fo'i i le oti e le'i mafaia ai lava ona taofia mai ail le malosi o le Toetu.

Tatou Faatoese i le Atua:

1. Ona o le vaivai o lo tatou ola faatuatua i lona alofa tunoa.
2. Ona o lo tatou ola faamaualuluga ua le mafai ai ona tatou o i lalo.
3. Ona o le maaa tele o tatou loto, ua faigata ai ona tatou talia ana tulafono ma ana poloa'iga

Tatou Tatalo i le Atua:

1. Ina ia avea o tatou tagata, e faamaoni e talia ana poloaiga ma ana tulafono.
2. Ina ia fesoasoani mai lona Agaga Paia ia i tatou, pe a fesouaina i tatou i faigata o le olaga.
3. Ina ia maua pea e i tatou le olioli ma le fiafia.

APERILA 30

Tusi Faitau: Ioane 14:1-7

Matua: Ioane 14:6 “*O a'u nei le ala, ma le upu moni, ma le ola; e le alu atu lava se tasi i le Tama, pe a le ui mai ia te a'u.*”

AUTU: “O IESU O LE OLA FOU”

Tatou Faafetai i le Atua:

1. Ona o le ola fou ua tatou maua.
2. Ona o Iesu o le ala, upu moni, ma le ola.
3. Ona ua na’o Iesu lava tatou te sao atu ai i le Atua.

Tatou Faatoese i le Atua:

1. Ona ua tatou le faaoga tatauina le ola ua aumaia e Iesu mo i tatou.
2. Ona ua tatou le taliaina i o tatou loto le ola fou mai ia Keriso.
3. Ona o lo tatou faatalale i le olaina o le ola fou mai ia Keriso

Tatou Tatalo i le Atua:

1. Ina ia aua lava ne’i mate le ola faaleagaga i le Au Kerisiano.
2. Ina ia tatou taliaina ma le fialia le ola fou mai ia Keriso.
3. Ia galulue ma faamalolosi, e faaauau le ola valaauiina ina ia manuia ai aiga, nuu, atunuu, aemaise o lana Ekalesia.

ME 7, 2022

Tusi Faitau: Faataoto 31:10-31

Matua: Faataoto 31:30 *“O le matagofie o le pepelo lea, o le mea faatauvaa le lalelei, a o le fafine ua mata’u i le Alii, e viia lava o ia.”*

AUTU: “O LE TINA E MATA’U I LE ATUA”

Tatou Faafetai i le Atua:

1. Ona o le sao taua o tina i totonu o aiga, nuu, atunuu, ae maise le Ekalesia ma le lalolagi atoa.
2. Ona ua avea tina lelei ma pae ma auli i lo latou pitolaau tauave.
3. Ona o tina o ulua’i savali o le Talalelei i le Toe Tu manumalo o Iesu Keriso.

Tatou Faatoese i le Atua:

1. Ona o le faamaoni o tina i le latou pito laau tauave i totonu o aiga.
2. Ona o le tuulafoa’ina o fanau e fai lo latou sa’olotoga
3. E le fautua lelei i tama mo se manuia o fanau.

Tatou Tatalo i le Atua:

1. Ina ia faamaoni tina i le tausiga o fanau i totonu o aiga.
2. Ina ia malosi tina i le ola tatalo i le Atua, ina ia manuia fanau i le lumana’i.
3. Ina ia lelei le fautua a tina mo tama mo le manuia o fanau.

ME 14

Tusi Faitau: Salamo 40:6-8

Matua: Salamo 40:8 “*Lo’u Atua e, ou te fiafia e fai lou finagalo....*”

AUTU: “**A’OA’O MAI IA LOU FINAGALO**”

Tatou Faafetai i le Atua:

1. Ona o manuia ua tatou maua mai ia te Ia, lea ua mafai ai ona faatino lo tatou ola auauna atu ia te Ia ma faia lona Finagalo.
2. Ona o lana Ekalesia i le lalolagi, ua fai lea ma faitoto’a tatou te auauna atu ai ia te Ia i soo se ala.
3. Ona lana Afioga Paia, ua fai lea ma fesoasoani sili o i tatou.

Tatou Faatoese i le Atua:

1. Ona ua tatou faamoemoe i lo tatou malosi, ae faatuatuaana’i le malosi mai le Atua.
2. Ina ua le atagia lona Finagalo, e ala lea i lo tatou ola tautua i lana Ekalesia.
3. Ina ua tatou le tausia ana poloaiga ma ana tulafono.

Tatou Tatalo i le Atua:

1. Ina ia a’oa’o mai pea lona Agaga, ina ia o tatou fiafia e faia lona Finagalo i le lalolagi
2. Ina ia faamanuia mai le soifua saili o le tagata i le Atua ma lona Finagalo.
3. Ina ia alofaina le lalolagi mafatia ona o le malosi o le faama’i ua aafia ai le lalolagi, ma le tele o le soifua ua maumau.

ME 21

Tusi Faitau: Galuega 7:55-60

Matua: Galuega 7:60 “*...Le Alii e, aua e te tuuina atu lenei agasala ia te i latou.*”

AUTU: “**IA MANINO LE VAAI ATU I LE ATUA**”

Tatou Faafetai i le Atua:

1. Ona o le fesoasoani mai o lona Agaga Paia, ua mafai ai ona manino le tatou vaai atu ia te Ia.
2. Ona o le a’oa’o mai lana Afioga Paia, ua fai lea ma lafitaga mo i tatou.
3. Ona o puapuaga o Keriso ua togiolaina ai le tagata agasala.

Tatou Faatoese i le Atua:

1. Ona o lo tatou ola tau ma sui i nisi o taimi.
2. Ona o lo tatou fefefe vale ma le le onosa’i e talia tiga e oo mai.
3. Ona o lo tatou taliga tuli i le musumusuga a le Agaga Paia.

Tatou Tatalo i le Atua:

1. Ia tatou maua le filemu moni ma ia te Ia.
2. Ia faasaogalemu mai tatou mai le loto tau'i ma sui.
3. Ia tatou maua le loto tele i taimi uma e oo mai ai fita ma faigata o le olaga.

ME 28

Tusi Faitau: Galuega 1:1-11

Matua: Galuega 1:8 *“...A e peita’i o le a maua e outou le mana, pe a afio ifo le Agaga Paia i luga ia te outou.”*

AUTU: ‘E AFIO MAI LE ATUA MA LE MANA’

Tatou Faafetai i le Atua:

1. Ona o le faamoemoe fou ua tatou maua, ona o lona afio mai le lalolagi e ala ia Iesu Keriso.
2. Ona o lona afio mai le lalolagi, ua faaalua mai ai le tele o lona alofa mai ia i tatou.
3. Ona o le filemu moni ua maua mai lona malo, ua avea ma mana ua fesoasoani ai le lalaolagi.

Tatou Faatoese i le Atua:

1. Ona o le tatou le onosa’i e faatalitali atu i lona Agaga Paia.
2. Aua ua tatou leo tetele i upu ae itiiti le faatinoga.
3. Ina ua vaivai la tatou molimau i le mana o le Agaga, i taimi e feagai ai i tatou ma faigata o le olaga.

Tatou Tatalo i le Atua:

1. Ina faaalua le malosi o lona mana, i o tatou ola ma galuega tatou te faatinoina, ina ia manuia lana Ekalesia.
2. Ina ia maua le filemu moni e le lalolagi ma lona mana alofa i atunuu feaina’i, ina ia maua le nonofo lelei.
3. Ina ia avea lana Ekalesia ma la e sususlu ata ai lana amiotonu i le lalolagi.

IUNI 4, 2022

Tusi Faitau: Galuega 2:1-13

Matua: Galuega 2:1 *“Ua oo atu fo’i i le Aso Penetekoso, sa i ai uma lava i latou i le mea e tasi ma le loto gatasi.”*

AUTU: “E AUMAIA E LE AGAGA PAIA TAGATA IA TASI”

Tatou Faafetai i le Atua:

1. Ona o manuia o le Agaga Paia ua faasoa mai, ma ua manuia ai tagata uma.

2. Ona o le nofo lelei ua aumaia e le Agaga Paia ua faatasia ai lana fanau fevaevaea'i.
3. Ona ua avea lona Agaga Paia, e fesoasoani i faaiuga tonu tatou te faia aua se manuia o tatou aiga, nuu e oo a i lana Ekalesia.

Tatou Faatoese i le Atua:

1. Ona o le lava o lo tatou onosa'i e faatalitali atu ai i le faaali mai o lona Agaga Paia mo le faia o faaiuga lelei, a ua faia lava o tatou loto.
2. Ona ua le maua le nofo lelei o lana fanau, ona o le manatu faapito, ma le faamaualuga.
3. Ina ua tatou tusitusilima i mea e fai, ua le mafai ai ona faatasia lana fanau.

Tatou Tatalo i le Atua:

1. Ina ia avea le afio mai o lona Agaga Paia, e fai lea ma o tatou fesoasoani sili.
2. Ina ia galueaina pea o tatou tagata e lona Agaga Paia.
3. Ina foa'i mai le loto maulalo i o tatou tagata e ala lea i le Afio mai o lona Agaga Paia

IUNI 11

Tusi Faitau: 1 Tesalonia 5:12-19

Matua: 1 Tesalonia 5:9 *“Aua tatou te tineiaina le Agaga Paia.”*

AUTU: “TALIA LE AGAGA PAIA”

Tatou Faafetai i le Atua:

1. I le faasinoga ua faailoa mai, ina ia tatou mautinoa le agalelei mai o lo tatou Atua, e ala i le ta'ita'iga a le Agaga Paia.
2. I a'oa'oga matagofie o loo faatupuina ai pea lo tatou ola olioli i le Alii i taimi uma.
3. I le puna a'e pea faapei o se vai e le pe le soifua tatalo e le aunoa o ona tagata.

Tatou Faatoese i le Atua:

1. Ona o lo tatou ola tetee i le galuega fesoasoani mai o le Agaga Paia.
2. Ona o lo tatou ola taumatemata i le galuega fesoasoani a le Agaga Paia i taimi uma.
3. Ona o lo tatou faataliga-tuli i le musumusuga a le Agaga Pia.

Tatou Tatalo i le Atua:

1. Ina ia o tatou talia male fiafia a'oa'oga a le Agaga.
2. Aua ne'i tineia le oo mai o le Agaga Paia.

3. Aua tatou te faa taliga tuli i lemusuusuga a le Agaga Paia.

IUNI 18

Tusi Faitau: Faataoto 4:1-9

Matua: Faataoto 4:1 “*Faalogo mai ia, outou le fanau e, i le a’oa’o atu a le tama, ma ua’i mai o outou taliga ina ia faaatamamaiina outou.*”

AUTU: “O LE ALOFA FAA-TAMA”

Tatou Faafetai i le Atua:

1. Ona o lona faapalepale faa-Tama, ua ia le tau mai ai ia i tatou e tusa ma a tatou agasala.
2. Ona o lona le tuulafoa’ina i tatou o lana fanau.
3. Ona o lona Alo Pele o Iesu Keriso, na malieu ae o lona toetu manumalo mai le oti ma le tuugamau lea ua tatou maua ai le ola ma le manuia e faavavau.

Tatou Faatoese i le Atua:

1. Ona ua faatamala tama, i ona tiute faa-tama i totonu o aiga.
2. Ona o le vaivai o le ola tapua’i o le tama.
3. Ona o le to’ilalo pea o tama i faaososoga a le tiapolo.

Tatou Tatalo i le Atua:

1. Ina ia faamaoni tama i o latou tiute faa-tama i totonu o aiga, nuu, ma le ekalesia.
2. Ina ia malosi tama i le ola tatalo, ma le soifua ofoina atu i lau galuega.
3. Ina ia lelei le taitaiina o tama i totonu o aiga, nuu, ma ekalesia mo le manuia i le lumanai.

IULAI 2, 2022

Tusi Faitau: Mataio 4:12-17

Matua: Mataio 4:17 “*Talu mai ai na afua ona tala’i atu e Iesu, ua fa’apea atu, “Ina salamo ia outou; auā ua latalata mai le malo o le lagi.”*”

AUTU: “O LE LOTO SALAMO TATOU TE SĀO AI I LE MALO O LE LAGI”

Tatou Faafetai i le Atua:

1. Ona o luitau o le ola e tofotofoina ai tatou i lea aso ma lea aso, ua tatou sao mai ai ona o Lana puipuiga.
2. Ona o lona mafuta mai pea ia i tatou e ala i lona Agaga Paia i aso uma e le aunoa.
3. Ona o le avanoa lelei ua tatou maua i le loto salamo ma fa’atuatua i le malieu ma le toetu manumalo o Keriso lea ua tatou sao ai i Lona malo fa’avavau.

Tatou Faatoese i le Atua:

1. Ona o le tele o taimi e tofotofoina ai tatou i faigata, ua tatou le iloa ona tetee atu, ma tatou o ese ma Ia.
2. Ina ua tatou le maua le loto salamo moni ma foi atu ai i le Alii.
3. Ona o lo tatou ola fa'atamala i le tele o taimi, ua le atagia ai foliga alofa o lo tatou Alii i o tatou tagata.

Tatou Tatalo i le Atua:

1. Ina ia lavea'i tatou mai faigata uma o le olaga nei.
2. Ina ia taofia tatou mai le fa'avaivai e asaina fita e lutia ai i le ala;
3. Ina ia maua pea le loto salamo ma le ola mautinoa i o tatou loto, o le malo o le Atua lo tatou tau'i e tele.

IULAI 9

Tusi Faitau: Mataio 6:9-13

Matua: Mataio 6:10 *“Ia oo mai lou malo, Ia faia lou finagalo, I le lalolagi e pei ona faia i le lagi.”*

AUTU: “O LE MALO O LE ATUA, O LE MEAALOFA MO TAGATA UMA”

Tatou Faafetai i le Atua:

1. Ona o ana mea-alofa ma Lona tamaoiga ua tatou 'ae'ae ai i le ola nei.
2. Ona o loo avea pea Lona Agaga Paia ma fa'amanatu i tagata uma le meaalofa o le malo o le Atua.
3. Ona ua avea Keriso Iesu ma meaalofa sili, tatou saofagã ai i Lona malo fa'avavau.

Tatou Faatoese i le Atua:

1. Ona ua leai so tatou manatu mamafa i le meaalofa foi fua a le Atua mo i tatou.
2. Ona ua tatou manatu; e malosi atu faiga a le lalolagi ma ona suiga, ma mea ua tatou lafoa'i ai le Atua o manuia.
3. Ona ua le fa'asili i ai tatou Iesu Keriso le meaalofa sili a le Atua, e lima ta'ita'iina ai aiga, nuu ma Ekalesia.

Tatou Tatalo i le Atua:

1. Ina ia fa'amatala loto Lona Agaga Paia; le tãua o meaalofa foi fua a le Atua mo tagata uma.
2. Ona o Lona alofa tunoa lea ua manuia ai tagata uma i Lana fa'asoa.
3. Ina ia faia pea Lona finagalo ae le o tatou loto.

IULAI 16

Tusi Faitau : Mataio 5:11-12

Matua: Mataio 5:12a *“Ia outou olioli ma fiafia lava; auā o i le lagi lo outou tau i tele;”*

AUTU: “IA FIAFIA MA OLIOLI I LE ALII”

Tatou Faafetai i le Atua:

1. Ona o Lona fa’atupuina pea o le olioli ma le fiafia i o tatou loto i aso uma.
2. Ona ua maua e tagata uma le avanoa i le na tau i e tele e ala i le ola talitonu ma fa’atuatua.
3. Ina ua uma ona tapena e Iesu Keriso le ala mo le fiafiaga sili o le ola fa’avavau.

Tatou Faatoese i le Atua:

1. Ina ua fa’ananau o tatou loto i fiafiaga a le lalolagi, a ua fa’atuatua’i le Atua e maua ai le olioli ma le fiafiaga sili.
2. Ona ua tatou te’ena soo le musumusuga a le Agaga Paia e maua ai lo tatou olioli.
3. Ona ua leai so tatou olioli e maua i totonu o aiga, ina ua misia Keriso mai totonu o tatou aiga.

Tatou tatalo i le Atua:

1. Ina ia fa’atumauiina pea Lona olioli i totonu o tatou loto e tupu ai le ola fa’atuatua.
2. Ina ia malutia pea lo tatou atunuu i ona aao agalelei i aso uma e le aunoa.
3. Ina ia fa’atupu atili lo tatou fiafia e talai atu Lona finagalo alofa mo le lalolagi.

IULAI 23

Tusi Faitau: Mataio 12:22-28

Matua: Mataio 12:28 *“A e afai o le Agaga o le Atua ou te tulia ai e a’u o temoni, ua oo mai lava ia te outou le malo o le Atua.”*

AUTU: “UA OO MAI LE MALO O LE ATUA”

Tatou Faafetai i le Atua:

1. I a’oa’oga a le Alii o Iesu Keriso e uiga i Lona malo fa’avavau.
2. E ala i Lona Agaga Paia o loo fa’amanatu mai pea le ola fa’atuatua i le Atua e maua ai Lona malo.
3. Ona sa fetalai Iesu; o A’u nei o le Ala, Upu Moni, ma le Ola; e le sao atu se isi i le Tamā, pe a le ui mai ia te A’u.

Tatou Faatoese i le Atua:

1. Ona ua leai so tatou manatu mamafa i le ola fa'atuatua atu i le Atua i le tele o taimi.
2. Ona o lo tatou te'ena soo o Lona Agaga Paia o loo fa'amanatu mai ia i tatou Lona malo manuia.
3. Ona ua tatou le manatua Iesu Keriso ma ana a'oa'oga e fa'atatau i le malo o le Atua.

Tatou Tatalo i le Atua:

1. Ina ia fa'amanatu mai pea ia te i tatou Lona malo fa'avavau.
2. Ina ia a'oa'oina pea tatou, o Iesu Keriso o le ala i Lona malo.
3. Ina ia aua nei muta le ola fa'atuatua ma le ola talai a le ekalesia i Lona malo, ina ia saofaga uma tagata fa'atuatua i le na malo.

IULAI 30

Tusi Faitau: 1 Peteru 1:3-9

Matua: 1 Peteru 1:4 *“Ia i’u i le tofi e le pala, e leai se leaga o i ai, e le mamae lava, o loo teu ile lagi mo outou.”*

AUTU: “O LE LAGI O LO TATOU TOFI”

Tatou Faafetai i le Atua:

1. Ona o le tofi ua folafolaina mai mo i tatou e ala i le toe tu o Keriso.
2. Ona o le toe tu manumalo o Keriso mai le oti, ua avea lea ma manumalo o le Au-Fa'atuatua uma.
3. Ina ua tatou manutinoa le leai o se malosi o lenei lalolagi, e fa'ate'aeseina mai i tatou i le alofa tunoa o le Atua e ala ia Keriso Iesu.

Tatou Faatoese i le Atua:

1. Ona o loo avea pea le oti ma ala tau fa'amata'u i le olaga nei.
2. Ona ua leai so tatou manatu mamafa i le tofi ua folafolaina mai, ua teuina mo i tatou i le lagi.
3. Ona ua tatou manatu i 'oa o le olaga nei e pala, e le tumau, e gaioia e tagata.

Tatou Tatalo i le Atua:

1. Ina ia fesoasoani mai Lona Agaga ina ia fa'asili pea i o tatou loto le fa'atuatua ia Keriso Iesu.”
2. Ia fa'aalia i o tatou ola le olioli i le fa'aolataga ua Ia faia e ala ia Iesu Keriso, lo tatou Alii.
3. Ia galue mai pea le mana o le Agaga Paia o le Atua i o tatou tagata, ina ia fa'atumaia ai pea lo tatou olioli i Lana fa'aolataga.”

AUKUSO 6, 2022

Tusi Faitau: Mataio 5:17-20

Matua: Mataio 5:20 “*Auā ou te fai atu ia te outou, a le sili la outou amiotonu i la le Au-Tusiupu ma le Au-Faresaio, e le sao atu lava outou i le malo o le lagi.*”

AUTU: “IA FAIA LE AMIOTONU, AUA O LONA TAUI O LE MALO O LE LAGI”

Tatou Faafetai i le Atua:

1. I lana Afioga Pa’ia o loo fa’amalieina ai pea lo tatou matelāina ma lo tatou galala fa’aleagaga.
2. I le galuega a le Agaga e a’oa’o uiga loloto o Afioga a le Atua, ina ia tatou savali i Lana amiotonu.
3. Ina ua fa’aalia ia Iesu Keriso Lana amiotonu, ua fai lea ma alafua i le ola fa’a-Kerisiano.

Tatou Faatoese i le Atua:

1. Ona ua manatu le tagata e sao i le malo o le lagi i mea lelei na te faia.
2. Ona ua vaivai le Ekalesia e fa’amalamalama le amiotonu e finagalo i ai le Atua mo le tagata uma.
3. Ona ua le ‘ana’ana tagata i le finagalo o le Atua, a ua tausisi atu i ala o le tulafono e ta’uamiotonuina ai.

Tatou Tatalo i le Atua:

1. Ina ia fa’a’iloa mai pea le amiotonu a le Atua i lana Ekalesia.
2. Ina ia ola fiafia tagata uma ma faia le amiotonu, naunau i le alofa, ma ia feoa’i ma le Atua ma le loto fa’amaulalo.
3. Ua fai le lagi ma fiafiaga o le Au-Kerisiano uma lava.

AUKUSO 13

Tusi Faitau: Luka 10:17- 24

Matua: Luka 10:20 “*Ae peita’i, aua tou te olioli i lenei mea, ina ua usiusitai agaga ia te outou; a ia olioli on aua tusia o outou igoa i le lagi.*”

AUTU: “E TAUI E LE ATUA LOU TAUTIGA I LANA GALUEGA”

Tatou Faafetai i le Atua:

1. Ona o le manuia ua maua e tagata uma o loo galulue mo Ia ma Lana fa’aolataga.
2. Ona o Lona Agaga Paia o loo tupu ai pea le olioli i o tatou tagata e galulue ma fa’amalolosi i Lana Talalelei.
3. Ona o le togiola na saunia e Keriso e ala i le fa’aolataga ua manuia ai tagata fa’atuatua uma.

Tatou Faatoese i le Atua:

1. Pe afai ua le fa'atinoina o tatou tiute fa'a-tagata-Kerisiano i le galuega tala'i a le Atua.
2. Ona ua tatou manatu lava i se potu itiiti ua tatou maua, ma ala ua tatou fa'apea ifo ai; o i tatou lava na afua ai lo tatou manuia.
3. Pe afai ua sesê la tatou fa'amamafa e tau'i lo tatou tautiga i 'oa a le lalolagi.

Tatou Tatalo i le Atua:

1. Ina ia manuia le galuega fa'a-misionare e ala i le galuega talai i le lalolagi.
2. Ina ia fesoasoani lona Agaga Paia i le galuega tala'i o loo fa'atino i totonu o aiga ta'itasi.
3. Ia tatou mautinoa o le galuega tala'i e le na o le asō, a o aso uma lava o le ola.

AUKUSO 20

Tusi Faitau: Kolose 1:9-14

MATUA: Kolose 1:13 *“O Ia ua na laveai mai ia i tatou nai le pule a le pouliuli, a ua na aumaia i tatou i le malo o Lona lava Alo pele;”*

AUTU: **“O LE MALO O LE ATUA E MAUA IA IESU KERISO”**

Tatou Faafetai i le Atua:

1. Ona o Lona alofa ua laveaiina ai i tatou mai i le tele o mailei a le fili a lenei olaga.
2. Ona o lo tatou ta'u o tagata kerisiano e ala i le ola talitonu ma fa'atuatua i le Atua.
3. Ona o Iesu Keriso lo tatou Alii o lo tatou ala lea i Lona malo fa'avavau.

Tatou Faatoese i le Atua:

1. Ona ua leai so tatou fa'amaoni e talai atu Iesu Keriso i isi tagata, ina ia latou maua le malo o le Atua.
2. Ona ua le fa'atino o tatou tiute fa'a-mātua i le a'oa'oina o fanau i ala o le Atua e maua ai Lona malo.
3. Ona ua tōsina loto o le ekalesia i fiafiaga o le lalolagi, a ua fa'atuatuana'i le Atua ma Lona malo.

Tatou tatalo i le Atua:

1. Ia maua e lana Ekalesia ma le au Faatuatua uma lava lea manatu sa ia Keriso Iesu, o le lotomaulalo ma le usita'i i le Tama.

2. Ia lototele i tatou uma e fa'aa'oa'o i le soifua o Iesu Keriso i le ola ofoina atu mo le Atua ma Lona malo.
3. Ia maua le loto salamo moni ma maua'a le ola fa'atuatua a le Ekalesia i le Atua ma Iesu Keriso le ala i le malo fa'avavau.

AUKUSO 27

Tusi Faitau: Mataio 28:16-20

Matua: Mataio 28:19 *“O lenei, ia outou o atu e fai nuu uma lava ma soo, ma papatiso atu ia te i latou i le Suafa o le Tamā, ma le Atalii, ma le Agaga Paia;”*

AUTU: “O TATOU O AUAUNA A LE ATUA”

Tatou Faafetai i le Atua:

1. Ona o Iesu Keriso o le auauna loto maulalo. O le ala mo soo se Kerisiano ma le valaauina e fai le finagalo o le Atua.
2. Ona o matua ma le auaunaga i le Atua e ala i le a'oa'o o fanau ma aiga; e faaeaina le auauna faamaoni.
3. Ona o le Ekalesia o loo faailoa i ana galuega le auaunaga i le Atua ma le loto maulalo ao taitaiina pea le atunuu e auauna ia Iesu Keriso o le ola.

Tatou Faatoese i le Atua:

1. Ona o loo faia pea e Kerisiano le galuega faa-Faresaio o le lauga atu i le alofa o le Atua ae le mulimuli ai.
2. Ona o matua ua le fai se faataitaiga lelei i fanau ma aiga, a ua tausolomua le inu ava ma faaaoga fualaa faasaina.
3. Ona ua faaaoga e le Ekalesia lona tulaga e folafola ai ae le faia, e faafefeteina ai le vaaiga, ma taualoa ai i le va fealoaloai a ua leai se auaunaga mo le atunuu e pei ona valaauina a e Keriso.

Tatou tatalo i le Atua:

1. Ina ia faia e Kerisiano le auaunaga e tusa o le faataitaiga a Iesu Keriso.
2. Ina ia aoaoina e matua fanau i le ola galulue ma auauna e atiina a'e aiga ma le galuega a Keriso Iesu.
3. Ina ia puea le Ekalesia i le lotomaulalo e tupu ai le lototele e faia le finagalo o le Atua. Ia aua lava nei talaoole, pe faafefeteina, pe fiasili ae sagai ane e taitai le atunuu ia muamua le Atua.

SETEMA 3, 2022

Tusi Faitau: Luka 9:1- 6

Matua: Luka 9:2 *“Ua 'aauina atu i latou e Ia e tala'i i le malo o le Atua, e fa'amalolo foi i e mama'i.”*

AUTU: “AUA NE’I MUTA LE OLA TALA’I”

Ia tatou Faafetai i le Atua:

1. Ona e ui lava i le tele o tatou fa’aletonu, ae fou mai pea ana fa’amanuiaga mo i tatou i aso uma.
2. Ina ua avea i tatou o mātua ma faiaoga i le talalelei a le Alii i ã tatou fanau.
3. Ina ua avea le ekalesia kerisiano ma auala e ala atu ai Lana talalelei mo le lalolagi atoa.

Tatou Faatoese i le Atua:

1. Ona o lo tatou faia o mea ua le tusa ma le finagalo o le Atua, ua le atagia ai Lana talalelei.
2. Ona o i tatou lava o le fotu o le agamasesei, ma ua toilalo pea i fa’aosoosoga a le tiapolo i aso uma.
3. Ona ua leai se ola fa’amalolosi o i tatou o le ekalesia e talai atu le talalelei ina ia ola ai nisi agaga ua vaivai.

Tatou tatalo i le Atua

1. Ia aua lava ne’i aveesea lona Agaga Paia i luga ia i tatou, ina ia tatou lagona ai pea le mafanafana o Lona alofa tunoa.
2. Ia fa’aaogaina pea lana Ekalesia mo le galuega tala’i, ae a se leleiga i le lalolagi fevaevae’i.
3. Ia iloa e lana Ekalesia ona fa’alelei o ia ma le Atua, ona moni ai lea o le ola valaauina i le galuega tala’i.

SETEMA 10

Tusi Faitau: Ioane 3:1- 15

Matua: Ioane 3:3 *“Ua tali atu Iesu ia te ia, ‘E moni, e moni, ou te fai atu ia te oe, a le toe fanau le tagata, e le mafai ona iloa e ia o le malo o le Atua.’”*

AUTU: “E AO ONA TOE FANAUFUINA LE TAGATA”

Tatou Faafetai i le Atua:

1. Ona o le manuia ua maua e Kerisiano o loo galulue mo le Atua ma lana faaolataga.
2. Ona o lona tamaoiga i le agaga o loo tupu ai pea le olioli o matua e a’oa’o fanau i le tala o le faaolataga ia Iesu Keriso; e fa’afouina ai le tagata.
3. Ona o le fa’atinoga e le Ekalesia o le galuega tala’i mo le manuia o le atunuu ma le ola toe fuataina.

Tatou Faatoese i le Atua:

1. Pe afai ua sese le fa'amamafa a le Au-Kerisiano i le galuega talai ae le fa'afoi le viiga i le Atua o le matai o le galuega.
2. Ona ua fa'avi'ivi'i ma'tua i lo latou lava poto i le a'oa'oina o fanau; a ua le a'oa'oina i le Afioga a le Atua e fanau fouina ai o latou agaga.
3. Pe afai ua sese le fa'amamafa a le Ekalesia i mea e mitamita; a ua galo le Alii e fanau fouina ai le agaga o le tagata.

Tatou Tatalo i le Atua:

1. Ia manuia Kerisiano uma ma le galuega talai i le lalolagi; ae a le fa'afouina o agaga o tagata mo le Atua.
2. Ia fesoasoani lona Agaga i le galuega tala'i a matua i totonu o aiga.
3. Ia mautinoa e le Ekalesia o le galuega tala'i e tupu ai le fanau fouina o le agaga o le tagata mo le Atua ma Lana galuega.

SETEMA 17

Tusi Faitau: Luka 6:1-5

Matua: Luka 6:5 *“Ua fetalai atu foi o Ia ia te i latou, ‘o le Atalii o le tagata, o le Alii lea o le sapati.’”*

AUTU: “O LE TALALELEI A LE ATUA E FAAVAE I LE ALOFA”

Tatou Faafetai i le Atua:

1. Ona o le alofa o Iesu Keriso, ua mafai ai ona tala'i le tala lelei i le lalolagi atoa.
2. I le tala lelei o le alofa tunoa o Iesu Keriso, ua mafai ai ona a'oa'oina o tatou fanau ma aiga i le upu moni.
3. Ona o le fa'aolataga na saunia e Iesu Keriso, ua avea lea ma ogatotonugalemu o lo tatou fa'atuatuaga ma le 'auga o le talalelei mo tagata uma.

Tatou Faatoese i le Atua:

1. Ona o le mapo tulafono o le tagata Kerisiano.
2. Pe afai ua fa'amamafa e matua le tulafono i fanau ma totonu o aiga, ae le o le aoaoga lea a Keriso mo le fa'aolataga.
3. Ona ua matou le fa'atāuaina le auga o le faaolataga na saunia e Keriso.

Tatou Tatalo i le Atua:

1. Ina ia avea i tatou ma Kerisiano e atagia atu ai le alofa o le Atua mo isi tagata.
2. Ina ia usita'i ma fa'atino e matua le alofa fa'amaoni o le Atua mo fanau ma aiga.

3. Ina ia avea le Ekalesia e fa'ataunu'u le alofa o le Atua mo tagata uma.

SETEMA 24

Tusi Faitau: Luka 8:4-15

Matua: Luka 8: 8 *“Ua pa’û foi isi i le eleele lelei; ua tupu, ua fua mai taiselau i fua.” Ua fetalai atu ia i nei mea, ona alaga atu lea, “O le ua i ai taliga e faalogo ai, ina faalogo mai ia o ia.”*

AUTU: “O LE TALALELEI A LE ATUA, O LE UPU MONI O LE OLA”

Tatou Faafetai i le Atua:

1. Ona o le sa’olotoga ua tu’uina mai e le Atua mo i tatou e filifili ai i le Upu o le Ola.
2. Ona o Lana Upu ua luluina i totonu o aiga e ta’ita’iina ai i le ola fa’avavau.
3. Ona o Lana Upu lea na maliu ma toe tu manumalo mai le oti, lea ua tatou saofaga ai i Lona malo fa’avavau.

Tatou Faatoese i le Atua:

1. Ona ua tatou lê taliaina le Upu a le Atua e maua ai le ola ma le manuia fa’avavau.
2. Ona ua fa’atalale mātua e fafaga fanau i Upu o le Ola mai i Afioga a le Alii.
3. Ona ua le fa’atauaaina e le Ekalesia le Upu o le tala lelei ia Iesu Keriso e talia ma usitai i ai.

Tatou tatalo i le Atua:

1. Ina ia avea le Upu moni a le Atua e fa’aosofia o tatou tagata e galulue ma le faamaoni e faatino Lona finagalo alofa.
2. Ina ia manino la tatou fa’alogo ma ia usita’i i le Upu a le Atua e manuia ai o tatou aiga mo le lumana’i.
3. Ina ia talia e le Ekalesia le Upu moni sa luluina e Keriso e tapasā ai Lana galuega fa’a-misionare i le lalolagi.

OKETOPA 1, 2022

Tusi Faitau: Galuega 8:9-24

Matua: Galuega 8:22 *“O lenei, ia e salamo i lou nei leaga, ma e faatoga atu i le Atua, pe mafaia ona faamagaloina le manatu o lou loto.”*

AUTU: “E LĒ FA’ATAUINA LE AGAGA PAIA”

Tatou Faafetai i le Atua:

1. E ui i le femoumoua'i o le tagata, ae ua lē mafai ai lava ona te'a ese lona alofa ma lona agalelei.
2. I Lona tuuavanoa mai pea, ma ua Ia le tau'i ma sui iai tatou, ae o lo'o ia amanaia mai pea lo tatou faatauva'a.
3. Ona o le Agaga Paia, ua fai pea lea ma o tatou fesoasoani silisili i taimi uma ma aso uma o le olaga.

Tatou Faatoese i le Atua:

1. Ona ua tatou faalagolago ma faamoemoe pea i se malosi a'o se potō itiiti ua tatou maua, ma ua faatuatuaana'i le musumusuga a le Agaga Paia i o tatou loto.
2. Ona ua fai i tatou ma tagata taufa'asesē i le Talalelei, o a tatou amio ma uiga ua fai ma auala ua faatausui ai nisi o le 'au faatuatua.
3. Ona o lo tatou manatu fa'atauva'a i le meaalofo a le Agaga Paia, ua leai se manatu mamafa i le Fesoasoani mai o Lona Agaga.

Tatou Tatalo i le Atua:

1. Ina ia o tatou lagona faatasi le taua ma le malosi o le Mana o le Agaga Paia, na te ta'utoaluaina o tatou olaga o aso uma.
2. Ia fa'aaogaina o tatou tagata e fai ma ave fe'au o le Talalelei i so'o se ala e mafai ona tautua ai mo Lona finagalo.
3. Fa'agagaina i tatou e Lona Agaga, e tala'i Lana upu i totonu o tatou aiga ma nuu.

OKETOPA 8

Tusi Faitau: Luka 15:11-24

Matua: Luka 15:24 *“Auā o lo'u atalii lenei, na oti, ua toe ola mai; na le iloa foi o ia, a ua maua. Ona latou olioli ai lea.”*

AUTU: “O LE FEILOAIGA FA'ALEAIGA”

Tatou Faafetai i le Atua:

1. E ui lava ina tatou aaitui i Lona finagalo i le tele o aso, ma o lo'o tatou soli pea ana poloaiga na tuuina mai, 'ae ua lē mavae ai le tunoa o Lona alofa.
2. O Lona alofa fa'a-Tamā, ua maua ai pea le mafanafana ma le lototetele o tatou tagata e ala i Lana ta'ita'iga mana.
3. Ona o le faaolataga na Ia saunia e ala ia Iesu Keriso, ua fai lea ma o tatou ala i malo, e maua ai pea le so'otaga vāvā lalata ma Ia, o le Atua o Ola.

Tatou Faatoese i le Atua:

1. Ona ua naunau o tatou loto i tuinanauga o le olaga nei, ua fai ma ala ua pumo'omo'o ai le vaai i le Talalelei mo Lona valaauina o i tatou i faiva ma tiute.
2. Ua tatou faamuamua le sailiga o le oa, ua ave atoa iai lo tatou malosi ma taimi, ae ua leai ai se manatu i le Atua, le pogai o le ola.
3. Ona ua leai se ava fatafata, leai se faaaloalo e tausii ai le va tu-nonofu ma e matutua, o tatou matua, aemaise le va-tapuia ma le Atua.

Tatou Tatalo i le Atua:

1. Ia faia se loto fou mo i tatou, ma ia aoga mea e tutupu i le ola e fai ma ta'iala e a'oa'oina ai lo ta aga'i i luma.
2. Ia fa'aatamamaiina o tatou tagata, ia iloa le sa'o mai le sese, ia iloa fo'i le lelei mai le leaga.
3. Ia maua le tofa manino ma le faautaga, aemaise o le loto matala, e iloa ai ona fetu'utu'una'i ma filifili ma le tatau.

OKETOPA 15

Tusi Faitau: Galuega 11:1-18

Matua: Galuega 11:17 *“O lenei, afai e tusa le alofa ua foaiina mai e le Atua ia te i tatou atoa ma i latou, o ai ea a'u nei ou te mafaia ona vavao atu i le Atua?”*

AUTU: “TALITONU I LE GALUEGA A LE AGAGA”

Tatou Faafetai i le Atua:

1. Ona o Lana ta'ita'iga mana, o lo'o gasolosolo lelei ai pea fuafuaga ma lavasiga o feagai ma o tatou tagata i aso fai-so'o.
2. Ona o lo'o molimauina pea e o tatou mata galuega mana a ona lava aao alofa, i le siosiomaga, o le lafanua, le sami ma le laueleele.
3. Ona o le valaauina ma le faaogaina o i tatou i faiva ma tiute ese'ese ua Ia finagalo ai.

Tatou Faatoese i le Atua:

1. Ona o lo tatou manatu faapito, ma le vaai maualalo i isi o a tatou uso Kerisiano.
2. Ona o tatou loto-faamaualuga, ua faigata ai lava ona maua se nonofu fealofani i totonu o aiga, o le nuu, aemaise o le Talalelei.
3. Ona o lo matou tete'e pea i galuega lelei e maua ai le maopopoga, ae ua matou loto atu i manatu ma lagona e faatupuina ai pea le feitaga'i.

Tatou Tatalo i le Atua:

1. Ia foai manatu lelei e atia'e ai le Talalei, ma ia fai ma amio o aso uma le nonofo fealofani ma le fetausia'i.
2. Ia matou talitonu ma le faatuatua atoatoa i le ta'ita'iga a lou Agaga, e taunuu ai i le manuia.
3. Ia avea i tatou ma molimau i le alofa tunoa o le Atua, e ala i lo tatou olaina o ana Afioga i aso uma.

OKETOPA 22

Tusi Faitau: Mareko 14:26-31

Matua: Mareko 14:30 “... *E moni oute fai atu ia te oe, o lenei aso, o le po nei lava, a o le'i o'o i le vivini fa'alua o moa, e te faafiti faatolu mai ia te a'u.*”

AUTU: “IA MAU A'A LOU FAATUATUA”

Tatou Faafetai i le Atua:

1. E ui lava ina leo tetele a tatou upu ae itiiti faatinoga, ua le avea lea ma ala e mavae ai Lona alofa mo i tatou ma le lalolagi.
2. Tu'u-avanoa mai pea i le tagata, e ui lava ina tu-tu-mamao mai ia te Ia i le tele o taimi ae o lo'o ia manatu mai pea ma agalelei mai.
3. Ona o le faaolataga na saunia e alai a Iesu Keriso, ua tatou maua ai le avanoa e saofagā ai i le ola e faavavau pe a o tatou salamo faamaoni ma fo'i atu ia te Ia.

Tatou Faatoese i le Atua:

1. Ina ua tatou leo tetele a tatou tautinoga ma folafolaga i le Atua, ae ua itiiti lava galuega ua faatino ma faataunuu.
2. Ona o lo tatou pala'aai e feagai ma luitau, ma o tatou solomuli-gofie pe a tutupu faafitauli i le olaga nei, ua tatou fano lava i le faavaivai.
3. Ona ua le mau a'a o lo tatou faatuatua ia te Ia, ua tatou lē talitonu atoatoa, e leai lava se mea e faigata i le Atua.

Tatou Tatalo i le Atua:

1. Ia Faatupuina pea lo tatou ola faatuatua ia te Ia i aso uma lava e lē aunoa.
2. Ia faamalositia pea i tatou e Lona Agaga, ia tausisi ma le faamaoni i ta'utinoga ma folafolaga tatou te faia mo le Atua
3. Ia tatou maua le lototetele ma alolofa moni e tautua ai Lona finagalo i so'o se ala.

OKETOPA 29

Tusi Faitau: Luka 7:1-10

Matua: Luka 7:9 “*Ua faafofoga Iesu i nei mea, ona ofo ai lea ia te ia; ua fāliu o ia, ma fetalai atu i le motu o tagata e ua mulimuli mai ia te ia, ou te*

fai atu ia te outou, ou te lei iloa ia Isaraelu lava se faatuatua e faapena ona tele.”

AUTU: “MALOSI UA FAAFOUINA”

Tatou Faafetai i le Atua:

1. Ona o ana faamanuiga o lo’o tatou maua ina pea i aso uma, aemaise ai o le malosi ua faafouina e faatino ai o tiute ma tofiga ua valaauina ai i tatou.
2. O lo’o vaaia pea lona agalelei i totonu o tatou aiga, i le soifua laulelei o nai o tatou Tama ma Tina matutua, aemaise o ta’ita’i o tatou aiga, o le nuu aemaise le Talalelei.
3. E ui i faama’i pepesi aemaise o faalavelave e lofia ai pea lenei olaga, ae o lo’o iai faasoaso mai le malosi i lea aso ma lea aso.

Tatou Faatoese i le Atua:

1. Ona o lo tatou faagalo o le Atua, le pogai o manuia uma lava. Ma ua tatou le manua o Ia aemaise lava pe o tatou maua le manuia.
2. Ona ua tatou fia malolosi, ua tatou faalagolago i se poto itiiti ma se malosi faatauvaa ua tatou maua, a ua tele ai pe lo tatou sese.
3. Ona ua lē moni lo tatou ola faatuatua i le Atua i le tele o taimi, ua faafoliga a tatou auaunaga ma faatinoga.

Tatou Tatalo i le Atua:

1. Ia maua pea le loto salamo, ma ia faafouina pea o tatou lagona ma manatu e tonu ma lelei ai mea uma tatou te faia mo le Atua.
2. Ia iai Lona mana lavea’i i luga o lenei lalolagi mafatia ma le soifua ua olopalaina ona o le fili ana mailei.
3. IA faafouina pea lo tatou malosi i le tino, le mafaufau ma le agaga e faataunuu ai o tofiga ua valaauina ai.

NOVEMA 5, 2022

Tusi Faitau: Mataio 23:2-12

Matua: Mataio 23:12 *“O se fa’amaualuga o ia ia te ia, e fa’amaualaloina lea; a o se fa’amaualalo o ia ia te ia, e fa’amaualugaina lea.”*

AUTU: “FOA’I MA LE LOTO”

Tatou Faafetai i le Atua:

1. Auā o Ia lava na mua’i faia le faata’ita’i mo tatou uma e ala i le soifua foa’i, na ia faia ai le foa’i sili mo le lalolagi e ala i le soifua atoa o Iesu Keriso na ofoina mo tatou uma lava.
2. I manuia ua ia aao ai ma tuuina i o tatou lima e faatino mea uma e mana’o iai le tagata.

3. Ona o le loto alofa ma le agalelei ua ia aumaia i tatou tagata, e mafai ai ona tatou faia o galuega lelei mo isi.

Tatou Faatoese i le Atua:

1. Ua tatou le lagona le taua o le foa'i ma le loto malie mo Ia ma le Talalelei, ae ua faia mea uma e saili ai viiga o le tagata.
2. Ona o tatou loto faamaualuluga ma le faaususili, ua faatupuina ai pea le vaai maualalo i isi o a tatou uso i le Talalelei.
3. Ua tatou faia mea uma i vaiga faa-le-tagata, ma ua le moni ai le ola faitaulga mo lau Afio ma le Talalelei.

Tatou Tatalo i le Atua:

1. Ia fesoasoani Lona Agaga ina ia lagona e tagata uma le taua o le ola faitaulaga mo le Ia.
2. Ia goto i lagona ma manatu, ma ia fai ma masani le faia o taulaga ma le lotomalie ma le loto-atoa.
3. Ia maua le loto maualalo e tagata uma, o iina e tupu ai le filemu ma le fealolofa-a'i I totonu o mafutaga, aua o le fingingalo moni lea o le Matai o le Galuega.

NOVEMA 12

Tusi Faitau: Luke 19:1-10

Matua: Luka 19:10 *“Auā ua sau le atali'i o le tagata e saili ma faaola i lē na le iloa.”*

AUTU: “TOE FA'ASAGA TONU LE ALA”

Tatou Faafetai i le Atua:

1. Ona o Lona tuu-avanoa mai pea i o tatou tagata agasala ma le o ese so'o mai ia te ia.
2. I lona saili mai pea ma amanaia lo tatou le atoatoa ma le faatauvaa.
3. Ua ia le tau'i mai i o tatou leaga ma faaletonu, ae o lo'o ia faaaogaina pea i tatou mo ana fe'au ma galuega.

Tatou Faatoese i le Atua:

1. Ona ua tatou le faamaoni i tiute ma tofiga ua valaauina ai i tatou e galulue ai.
2. Ona ua tatou faia pea auala ma faatinoga sese, e saili ai o tatou manuia, ma ua galo ai i le tagata o lo'o silasila le Atua i mea uma tatou te faia.
3. Ona ua tatou le mafai lava ona faamagalalo atu i e ua agaleaga mai iai tatou.

Tatou te Tatalo i le Atua:

1. Ia alofagia o tatou tagata taumafai, ia agalelei ma tausia i tatou uma lava i Lona alofa tunoa.

2. Tatala pea lona agalelei, ma maua pea le avanoa e toe fuataina ai le ola o tatou tagata.
3. Faasagatonu o tatou tagata, ia matata'u ma alolofa moni ia te Ia ma le Talalelei.

NOVEMA 19

Tusi Faitau: Mareko 10:17-27

Matua: Mareko 10:22 *“Ona faanoanoa ai lea o ia ona o lea upu, ua alu ese fo'i ma le tiga, aua ua tele ana oa.”*

AUTU: **“O LE OLA FOAI”**

Tatou Faafetai i le Atua:

1. I le tele o faamanuiaga ua ia sasa'a mai i totonu o tatou aiga, o nuu, le faiga malo ma le ekalesia.
2. Ona o ana Afioga e a'oa'o mai pea, aemaise lenei taeao i le taua o le Ola foai ma le ola avatu ia fai ma amio fiafia o le tagata Kerisiano.
3. Ona o soifua o Keriso, ua fai lava lea ma fa'ata'ita'iga sili, o le soifua avatu, lea lava na auina mai ai Lona Alo Pele e toatasi, e saunia le faaolataga mo le lalolagi atoa.

Tatou Faatoese i le Atua:

1. Ona o lo'o taofi mamau pea o tatou lima i manuia ua tatou maua, ae ua leai se lagona o le faasoa atu isi o le 'au faatuatua o lo'o mana'omia le fesoasoani.
2. Ona ua tatou fiafia e talisapaia ma tali taoto manuia mai ia te Ia, ae ua le iloa ona toe avatu mo Ia ma le Talalelei.
3. O a tatou uiga fa'amauululuga ma le faasausili, ua tatou le iloa ai ona ava ma fa'aaloalo i le Atua, o Le e ala mai ai manuia uma lava.

Tatou Tatalo i le Atua:

1. Ia tatou maua pea le loto-maulalo ma le agamalu e faatino ai so'o se tautua ua tatou faia i totonu o tatou aiga, nuu, aemaise o le ekalesia.
2. Ia tatou lagona faatasi le taua o le OLA FOAI, le OLA FAASOA ATU, ia fai ma amio o aso uma, e pei ona e a'oa'o ma faatonu mai ina ia matou faia.
3. Ia tatou lagona, e tumua pea i tatou loto, ia faamuamua lava le Atua i mea uma tatou te faia.

NOVEMA 26

Tusi Faitau: Roma 8:28-39

Matua: Roma 8:31 *“O lenei, se a se tatou upu i nei mea? Afai ua 'au ma i tatou le Atua, o ai se fa'asaga tau mai ia te i tatou?”*

AUTU: **“SAOGALEMU I LE ALOFA O LE ATUA”**

Tatou Faafetai i le Atua:

1. Ona o Lana tausiga matalasi ia te'i tatou ma le lalolagi, lea ua tatou iai i aso fa'ai'u o lenei tausaga.
2. Ona o Lona le tuulafoaina o i tatou ma le savaliga umi o feagai ai, ae sa faamalumalu pea ona aao alofa i luga o i tatou uma lava.
3. Auā e ui lava i faigata ma puapuaga sa o tatou fesaga'i a'o faimalaga, na te le'i tuu-aunoaina lava i tatou lana fanau.

Tatou Faatoese i le Atua:

1. Ona ua tatou faavaivai e fesagai ma luitau o le ola, a ua iloa manino ai lo tatou le faalagolago ma faamoemoe ia te Ia o le Atua Pule Aoao.
2. Ona ua tatou sosola ese ma manana'o i se olaga fifilemu e aunoa ma ni faigata, ma ua tatou tu-mamao ai ma le Talalelei.
3. Ona ua tatou manatu ifo ua lava lo tatou malosi ma le potō e tali atu ai i so'o se faamoemoe, ma ua le manatu ifo ai i le Agaga Paia lo tatou Fesoasoani Silisili.

Tatou te Tatalo i le Atua:

1. Ia 'aao ta'ita'iina pea lo tatou ola i aso uma ma taimi uma, 'aua lava nei tuulafoaina i tatou e Lona Agaga.
2. Faamalumalu mai pea Lona alofa e saogalemu ma to'a-filemu ai a tatou faamoemoea uma, a'o iai i le faaiuga o lenei tausaga.
3. A'oa'o mai, faatonu mai, a'oa'i mai i tatou ma le lalolagi, ina manino ma iloa lelei i le tunoa o le alofa o le Atua mo tatou uma.

TESEMA 3, 2022

Tusi Faitau: Esoto 20:8-11

Matua: Esoto 20:8 *"Ia e manatua le Aso Sapati e te faapaiaina."*

AUTU: "TAOFI MAU I LE FAATONUGA"

Tatou Faafetai i le Atua:

1. I a'oa'oga e ala mai i le Tusi Paia, e mausali ai le ola faatuatua;
2. I le ola ma le malosi e faatinoina ai galuega fai i aso ta'itasi;
3. Ona o le a'oa'o mai pea o tulafono mo i tatou, ua fai pea ma alafua e tapena toaga ai le ola o le tagata Kerisiano.

Tatou Faatoese i le Atua:

1. Ona o le femoumoua'i o lo tatou faatuatua, e gata a i le upu ma le gutu la tatou tatalo, ae le o iai o tatou loto atoa;
2. Ona o le tele o taimi, ua fai le Aso Sa ma aso matou te mapu mai ai i fe'au ma galuega masani, ma matou momoe ma malolo ai i o matou

aiga, ae ua galo ai ona omai i le falesa e mafuta atu ia te oe le Atua soifua.

3. Ona ua tatou naunau ina ia foa'i mai e le Atua le tau'i o tatou tagata, ae tatou te le o ususita'I ma faamaoni i poloaiga ma faatonuga na tuuina mo le tagata soifua.

Tatou te Tatalo i le Atua:

1. Ia fafagu mai lo tatou ola mataala e manatua o IA aemaise o ana poloaiga ma tulafono i aso uma;
2. Ia le faia lana galuega i so tatou lava iloa, a ia tapuvae tasi i lona lagolago ma faatonu mai i mea e ao ona tatou faia;
3. Ia faamanatu mai i o tatou loto, e leai se mea tatou te mafaia e aunoa ma IA.

TESEMA 10

Tusi Faitau: Luka 2:22-35

Matua: Luka 2:29-30 *“Le Alii e, e te tuuina atu nei lau auauna, ia alu ma le manuia, pei o lau afioga; aua ua iloa e o’u mata faaolataga ua e saunia i luma o nuu uma lava;”*

AUTU: “**OLIOLI I LE ALII**”

Tatou Faafetai i le Atua:

1. Ona o ala manuia o le faaolataga ua taunu’u, ua tapisa ai i le olioli ona ua mautinoa le faamoemoe i le lumanai;
2. Ona e ui i le tu’u fesili i le ola faatalitali i le Atua, ae aumaia pea e le Atua ataata manino ma faa-mautinoa le tagata e iai lava le taimi o le Atua.
3. Ona o ua faamalieina o tatou loto ma agaga i le tele ma anoanoa’i o Lona agalelei mo tatou uma lava.

Tatou Faatoese i le Atua:

1. Ona o le ‘aiā ina pea e le loto masalosalo o tatou kerisiano;
2. Ona o le vaivai o lo tatou faatuatua e talitonu ai ma le matuā mautinoa i le Atua aemaise o le fanau mai o le tama o le faaolataga, na te lagaina le toilalo o le lalolagi.
3. Ona o le le tumau o lo tatou ola fiafia ia te IA ma le galuega, a ua faasufi gofie i le suamalie o le fili ma ana mailei.

Tatou te Tatalo i le Atua:

1. Ina ia faatumuina tatou i le olioli moni e ola tutumau i lana galuega;
2. Ina ia mumū ma susulu atu le malamalama o lo tatou ola faatuatua ia te IA, e mafai ai ona tineia le faavaivai ma le ola le mautinoa;
3. Ina ia le faia toa’i la tatou auaunaga mo IA, a ia faia ma le loto fiafia

TESEMA 17

Tusi Faitau: Galuega 4:23-31

Matua: Galuega 4:31 *“Ua mavae atu la latou tatalo, ona luluina lea o le mea ua faapotopoto ai i latou; ua tutumu foi i latou uma i le Agaga Paia, ma ua tautala atu i le afioga a le Atua ma le loto tele.”*

AUTU: **“IA LOTOTELE I LE TATALO”**

Tatou Faafetai i le Atua:

1. Ona Lona faatasi mai i fuafuaga ma lavasiga e feagai ai ma o tatou tagata. O lo’o lagona ina ai pea le mafanafana ma le lototele e galuelue ma tautua i so’o se faiva ua ofoina ai le ola.
2. Ona o le mafutaga vavalalata ua maua ma Ia e ala i le tatalo.
3. Ona o Lona faafofogaina pea o a tatou talosaga aemaise o faamoemoea uma lava tatou te tuu atu ia te Ia, o lo’o le aunoa ona ia faataunuina e ala i Lona alofa tunoa.

Tatou Faatoese i le Atua:

1. Ona ua tatou le fiafia e mafuta atu i le Atua e ala i le tatalo. Ae ua faaalu-vale o tatou taimi i mea lē aoga.
2. Ona tatou le lagona le taua ma ‘aano moni o le ola tatalo, ma ua tatou manatu ifo ai e mafai lava mea uma i le malosi ua ia te’i tatou.
3. Ona faatoa tatou manatua lava le taua o le tatalo pe a o’o ina fetai’i ma faigata o le ola nei.

Tatou te Tatalo i le Atua:

1. Ina ia fesoasoani mai Lona Agaga e tuumumusu tatou uma ma faamanatu mai le taua o le tatalo.
2. Ina ia a’oa’o mai pea Lona Agaga, ia tatou iloa ona tatalo ma fiafia e mafuta atu ia te Ia i taimi uma ma aso uma.
3. Ina ia manino ma talitonu le tagata faatuatua o le tatalo o le ‘aupega sili lea mai ia te Ia, tatou te mafaia ai mea uma.

TESEMA 24

Tusi Faitau: Luka 2:8-20

Matua: Luka 2:14 *“O le viiga i le Atua i mea aupitoaluga; ma le manuia i le lalolagi i tagata ua alofagia e ia!”*

AUTU: **“UA TAUNUU”** (*It is done!*)

Tatou Faafetai i le Atua:

1. Ona ua le toe mamao ona faai’u lea o lenei tausaga, a o maualuga pea lana tausaga alofa ia i tatou.
2. I le faapalepale o Lona alofa ua talia ai pea o tatou tagata le atoatoa ma le faatauvaa.

3. Ona o avanoa na aumai i lenei tausaga atoa tatou te galulue ai mo Ia ma Lana tala lelei.

Tatou Faatoese i le Atua:

1. Ina ua vaivai o tatou tagata e ofoina pea i le Alii Lona viiga i taimi ma aso uma o le ola.
2. Ina ua faavaivai o tatou tagata i le galuega a le Atua i lenei tausaga a mavae atu, ina ua pulca i tatou e le 'augata ma le fiu-gofie.
3. Ona ua mana'o pea le tagata i le viiga ma le mamalu o mea e patino i le Atua.

Tatou Tatalo i le Atua:

1. Ina ia lagona pea e le tagata lona uluai valaauina: O le vivii i le Atua e le aunoa.
2. Ina ia auai le ekalesia faatasi ma le foafoaga ma mea uma lava e vivii i le Atua.
3. Ina ia faamanuia le Atua i a tatou galuega faauma o lenei tausaga, aemaise galuega faufuaina o le tausaga fou.

TESEMA 31

Tusi Faitau: Luka 17:11-19

Matua: Luka 17:17-18 *“Ona fetalai atu lea o Iesu, ‘E le’i faamamāina ‘ea le to’asefulu? A o ifea le to’aiva? Ua le iloa ‘ea ni e toe foi mai e vivii atu i le Atua, na o lenei tagata ‘ese?’”*

AUTU: **“TUMAU LE VIIGA I LE ATUA! ‘AUA NE’I GALO!”**

Tatou Faafetai i le Atua:

1. Ona e ui i le femoumoua’i o le tagata i le mafutaga ma Ia, e lē mafai ai lava ona tu’ua ai Lona alofa ina ia magalo le tagata agasala;
2. Ona ua Ia lē tauai ma sui mai, ma ua lē amanaia o tatou vaivaiga e tele, ona o Lona alofa ia aofia tatou uma i lana faaolataga;
3. Ona ua Ia faafogaina le lagona faafetai a le to’atasi, e fai ma sui o le to’aiva o e ua to’ilalo i le agasala ma le toe fo’i atu e faafetai e tusa ma lona alofa.

Tatou Faatoese i le Atua:

1. Ona ua fai ma tatou amio-a’i i le faagalo so’o o le faafetai i faamanuiaga ua foa’i mai, aemaise o le viiga e ao ona toe faafo’i ia te Ia.
2. Ona ua avea lo tatou mau’oa i manuia e tele ma ala ua faato’ilaloina ai i tatou i le mana’o lasi, ma ua galo ai se faafetai i lē ua tatau ma onomea ona ave iai;

3. Ona ua itiiti lava le agaga faafetai i le Atua pe o tatou tatalo, a ua tele ina o tatou ole atu i mea tatou te manan'o iai.

Tatou Tatalo i le Atua:

1. Ia galue pea Lona Agaga i totonu ia i tatou, ina ia faatupuina pea i o tatou loto le lagona o le fia faafetai i le Atua i taimi ma aso uma;
2. Ia fesoasoani mai i o tatou tagata fia taumafai, ma le lē atoatoa. Ina ia lagona pea i manatu le ola fia vii ia te Ia.
3. Ina ia aveesea e lona lava mana mea uma ua pogisa ai la tatou va'ai, ma mea ua faigata ai ona faaleo lo tatou agaga faafetai i faamanuiaga e tele ua IA saunia mo i tatou.

TAUTINOGA MAFUTAGA AU LEOLEO

Ou te ta'utino atu, o le Mafutaga a le Au Leoleo, o le mafutaga tatalo a le Ekalesia, e galueaina ai le ola faaleagaga o le 'au faatuatua i le Atua.

Ou te ta'utino atu foi, o le Atua o le Agaga lava ia, e su'eina o tatou agaga ma fuatia o tatou loto.

O le mea lea ou te ta'utino atu, o le a ou su'esu'e ifo i lo'u ola, ma ou toaga i mafutaga tatalo ma tapuaiga, atoa ma mea fai uma a le Ekalesia. Ina ia ou le tama/teine pea i le faatuatua, a ia oo i le ua matua i le agaga.

Ou te ta'utino atu o le a fai ma a'u tatalo tauave:

"Le Alii e, ia e alofa mai ia te a'u le tagata agasala. Ia e foai mai le loto tele e suia ai mea ua tatau ona sui, ma le to'afilemu e talia ai mea e lē tatau ona suia, ma foa'i mai le atamai e iloa ai le eseese o ia mea. Ia oo mai lou malo, ma ia faia lou finagalo i le lalolagi e pei ona faia i le lagi. Amene!"



Tautua Printing Press
1 Kanana Fou St, P.O. Box 1537
Kanana Fou, American Samoa 96799
(684) 699-9810
<https://efkasonline.org>